

Yungzanh: Yunggh Beij Hwng Canjnieb Bang Vut Gungz

Ndwen 11 ngoenz 19, Liujcouh Si Yungzanh Yen mehmbwk “song hag song bejj” makgaemjgaet doxbejj caeuq aen hoih byaujcangh Yungzgangh Segih hwnjguh cingsaenz vwnzmingz youq gyaranz laujiangh ganghsinh yizminz siujjih banh, 37 ranz mehmbwk senj daeuj youq Yungzgangh Segih haenx camgya makgaemjgaet doxbejj. Hozdung muzdz dwg “yunggh bejj hwng canjnieb、yunggh bejj cienz dinfwngz、yunggh bejj gyau baengzyoux、yunggh bejj hawj baenz miz”, bangrengz vunzlai gungzhoj laisou vut gungz.

Geij bi neix daeuj, Yungzanh Yen yunggh gij fuengsik “yunggh ciengz lawh bouj”

bang vunzlai gungzhoj ndaem makgaemjgaet, dajcauh “makgaemjgaet Yungzanh” guekgya deihleix geiqhauh canjbinj binjbaiz, doi-doengh guh hung gij canjnieb makgaemjgaet Yungzanh, gyalai vunz ndaem mak souhaeuj. Daengz seizneix, Yungzanh Yen gungh miz 23853 ranz vunzguhnaz ndaem makgaemjgaet, ndawde ranzgungzhoj laeb dangjanq laeb gaj 8820 ranz, ndaem 35123 moux, ciemq 44.1% ranzgungzhoj laeb dangjanq laeb gaj. Doenggyaq ndaem makgaemjgaet daiqdoengh saedyienh 2.8 fanh lai vunz gungzhoj vut gungz, daiqdoengh 5 fanh vunzbaez doxhwnj couhnieb cauhnieb.

(Cinz Ginghoz/覃庆和)



▲ Gyoengq mehmbwk minzcuz vunznoix langhbaij makgaemjgaet.



▲ Yinhyozvei yienhciegz.

Ciet Lijyouz Vwnzva Liuz Sanhcej Gaiq Daihcib Yizcouh Guhsat

Ndwen 11 ngoenz 22 banhaemh, aen yizsi roengzmuq Ciet Lijyouz Vwnzva Liuz Sanhcej Gaiq Daihcib Yizcouh Gvangjsih caeuq “Yizcouh gyau” gyauhyangj yinhyozvei youq Yizcouh Gih Gveigiyen banh, Ciet Lijyouz Vwnzva Liuz Sanhcej Gaiq Daihcib Yizcouh Gvangjsih guh ndwen ndeu neix daengz neix guhsat lo.

Yinhyozvei cingj Gvangjsih Gyauhyangj Yozdonz daeuj yienj ciengz heiq yisuz ndeiawj ndeu hawj Yizcouh gak cuz vunzlai, caez roxyinh gij ronghsag Cungguk moq laebbaenz 70 hopbi. 《Haenh Geiznding》《Fwensien · Liuz Sanhcej》《Gou Caeuq Guekcoj Gou》daengj cezmuz, hawj yienhciegz bouxyawj yawj ndaej yinx dangqmaz, doengzseiz danqhaenh gij vwnzva neix miznaj lai.

Ciuq cam rox, aen ciet neix muzdz dwg “yunggh fwen cienz cingz、yunggh ciet gyau youx、yunggh lijyouz coi seng’eiq”, gangj ndei gij gojgaeq Yizcouh, langhbaij gij goekdae j vwnzva naekna Yizcouh song cien lai bi neix.

(Cinz Fanghshw Lanz Yungi/覃芳思 蓝勇)

Lungzswng: Maenznding Homfwt Bang Vut Gungz

Haeuj doeng doxdaeuj, aen cangj gyagoeng maenznding youq Lungzswng Gak Cuz Swciyen Lungziz Cin Gyanghliuj Cunh haenx, hoenz hwnjngeungeu, maenznding homfwt. Bi 2018, Gyanghliuj Cunh laeb-baenz vunzmbanj hozcozse, cujciz hawj vunzlai ndaem maenznding, yinxhaeuj Lungzswng Nungzmouyangh Swngghdai Nungzyez Haifat Mizhanh Gunghshw, guh faenjmaenznding、guh maenznding hawq, soucawx maenznding dangdieg, baujgyaq soudauq, gaijgez gij vwndiz gai maenznding, guhbaenz “gunghshw + hozcozse + nungzhoh” hwngfat vunqsik. Seizneix daengx cunh ndaem maenznding najdieg daengz 425 moux, moux sou ndaej 4000 lai gaen, moux souhaeuj daengz 3000 lai maenz. Aen cunh neix ranz laeb dangjanq laeb gaj 106 ranz miz 98 ranz ranzgungzhoj camgya ndaem maenznding, cwgoemq cingzsoq daengz 93% , rengzrwd daiqdoengh ranzgungzhoj laisou vut gungz.

(Vuz Swngghbinh Veiz Gizyangz/吴生斌 韦吉阳)



▲ Vunzlai caengh maenznding gai hawj aen cangj gyagoeng.

Sanhgyangh: Hag Daemj Man Ndae j Baenz Miz



▲ Mehmbwk cingq hag daemj man.

Ndwen 11 ngoenz 22, Sanhgyangh Dungcuz Swciyen youq diegsenjyouq Nanzcan Segih “aen cehgenh banggunz diengz dajsiuq Cinghvah” banh aen ban son’gyauq daemj man Dungcuz, 30 lai boux mehmbwk Nanzcan Segih camgya son’gyauq.

Aen yienh neix youq mwh guh hong senjdieg banggunz, laebdin mizmbangj mehmbwk senjdieg youq haenx rox dinfwngz daemj man、dajsiuq daengj, giethab dangdieg youq ndaw lijyouz banggunz canjnieb gij doxgaiq man Dungcuz、siuq Dungcuz daengj ndaej daengz bouxhek gyaez-maij, gaenxmaenx gyagiengz son-gyauq mehmbwk senjdieg youq haenx dinfwngz, gya’ gvangq diuzroen couh-nieb, hawj mehmbwk senjdieg youq ranz couh ndaej miz souhaeuj, saedyienh “buen ndaej ok、youq ndaej onj、ndaej baenz miz”.

(Vuz Lenyinh/吴练勋)